

Polemik Perceraian di Malaysia

Shafiyah Iqlima binti Mohd Nadzri Kluster Kesejahteraan Sosial

Polemik Perceraian di Malaysia

Kertas **PERSPEKTIF** adalah satu siri penulisan oleh pengarang bagi mengemukakan pelbagai maklumat dan pandangan kepada pembaca mengenai sesuatu tajuk.

Semua fakta dan perspektif yang dinyatakan adalah di bawah tanggungjawab pengarang.

Sehubungan dengan itu, pengarang amat berbesar hati sekiranya para pembaca juga dapat berkongsi maklum balas mengenainya.

Emel Pengarang : iqlima@tsis.my

Polemik Perceraian di Malaysia

Oleh : **Shafiyah Iqlima binti Mohd Nadzri** (Felo Kluster Kesejahteraan Sosial)

Ringkasan

Statistik perceraian di Malaysia masih berada pada paras yang membimbangkan. Jabatan Kehakiman Mahkamah Syariah telah mengeluarkan satu rekod yang menunjukkan bahawa purata penceraian bagi tahun 2018 adalah sebanyak 156 pasangan pada setiap hari. Inisiatif seperti kursus pra perkahwinan, mediasi kaunseling, SMARTSTART 2nd Honeymoon yang dijalankan oleh pelbagai pihak antaranya Jabatan Kebajikan Masyarakat, Pejabat Agama, Jabatan Bantuan Guaman serta Non-Government Organisation (NGO) seperti Women's Aid Organization (WAO), All Women Action Society (AWAM), Women Crisis Centre (WCC), BEFRIENDERS masih lagi tidak mampu membendung masalah ini daripada terus berlaku. Justeru, setiap inisiatif serta dasar yang disediakan mestilah berfokus dan menjurus kepada jalan penyelesaian kepada punca utama perceraian.

Pendahuluan

Laporan Berita Harian 15 Oktober 2019 melaporkan kes pembunuhan kejam seorang suami yang memotong isterinya kepada 8 bahagian berpunca daripada masalah rumah tangga. Kes seperti ini menjadi bukti masalah rumah tangga semakin parah di Malaysia. Bukan hanya bercerai malah turut membawa kepada pembunuhan kejam. Oleh itu, semua inisiatif untuk membendung masalah rumah tangga yang boleh membawa kepada perceraian perlu menjurus kepada penyelesaian masalah utama

iaitu sikap ataupun personaliti suami isteri, masalah kewangan dan keganasan rumah tangga.

Statistik yang dikeluarkan oleh Jabatan Perangkaan Malaysia menunjukkan purata kes perceraian yang direkodkan sepanjang tahun 2014-2017 adalah sebanyak 50,978 kes setahun bagi pasangan Islam, manakala pasangan bukan Islam dalam tempoh yang sama adalah 9,933 kes setahun. Berdasarkan statistik mengikut negeri pula, bagi tahun 2017, Selangor mencatat kes tertinggi dengan 12,204 kes seterusnya Johor dengan 4,588 kes, Kelantan 3,652 kes dan Kedah 3,474 kes.

Punca utama perceraian adalah sikap dan personaliti pasangan suami ataupun isteri. Suami atau isteri yang tidak bertanggungjawab, tiada persefahaman, panas baran serta curang. Menurut Perunding Motivasi dan Kaunseling Keluarga, Dr Robiah K Hamzah, kebanyakannya yang tergamak berlaku curang dalam perkahwinan adalah kaum suami. Fakta itu dijelaskan menerusi purata 10 kes kaunseling rumah tangga yang pernah dirujuk kepadanya. Sebanyak 8/10 kes adalah suami curang. Malah akhbar Sinar Harian turut melaporkan kes suami curang sehingga sanggup bersetubuh dengan wanita lain selepas selamat mengerjakan haji.

Selain itu, sikap tidak bertanggungjawab juga sering dijadikan punca perceraian sebagai contoh berita yang dilaporkan di dalam berita Astro Awani yang bertarikh 11 Julai 2019, suami yang tidak bekerja sanggup menceraikan isterinya disebabkan isteri baru lebih berkemampuan berbanding isteri lama walhal suami yang sepatutnya menanggung beban tersebut. Sikap serta kefahaman yang kurang terhadap tanggungjawab suami isteri punca utama perceraian berlaku.

Hasil Kajian Penduduk dan Keluarga Ke-5 mendapati punca utama perceraian yang berlaku antara lelaki dan wanita adalah kerana personaliti suami atau isteri sehingga timbulnya pelbagai masalah rumah tangga. Selain itu, ‘trend’ terbaru punca perceraian yang dilaporkan di Parlimen disebabkan oleh perkara-perkara remeh yang berpunca daripada sikap pasangan sehingga mendorong kepada perceraian. Antara kes yang pernah dilaporkan ialah isteri suka membasuh baju pada waktu malam, suka mengikuti rombongan beramai-ramai, suami tidak suka isteri makan dalam kereta, gaji suami lebih rendah daripada isteri dan pasangan tidur berdengkur.

Antara satu kesalahan yang amat nyata kebelakangan ini adalah menormalisasikan perkahwinan tanpa perancangan kewangan yang kukuh dalam kalangan anak muda. Menurut Pensyarah Universiti Teknologi Mara (UiTM), masyarakat muda kini menjadikan ‘trend’ perkahwinan dengan kewangan yang tidak stabil. Hal ini dapat dilihat melalui statistik Jabatan Pendaftaran Negara menunjukkan bahawa masalah kewangan adalah antara punca utama kes perceraian di Malaysia iaitu sebanyak 17,359 kes.

Inisiatif yang Sedang Dijalankan

Pelbagai inisiatif yang telah dijalankan samada oleh Kerajaan mahupun Kerajaan Negeri, Mahkamah Syariah dan juga NGO namun sehingga kini kes perceraian tetap tidak mampu membawa kepada pengurangan yang signifikan.

Oleh itu, setiap inisiatif ini memerlukan penambahbaikan agar usaha tersebut dapat dijadikan platform penyelamat kepada perceraian. Inisiatif ini dibahagikan kepada dua peringkat. Peringkat praperkahwinan yang diberikan kursus praperkahwinan SMARTSTART, peringkat pasca perkahwinan disediakan mediasi kaunseling dan SMARTSTART 2nd Honeymoon.

1. Kursus Pra perkahwinan

Model Bersepadu Kursus Praperkahwinan Islam (MBKPI) telah digubal oleh Jabatan Kemajuan Islam Malaysia (JAKIM) pada tahun 1996 dan diwajibkan pelaksanaannya sejak tahun 1997. Lebih sedekad kursus ini dilaksanakan dan realitinya masalah perceraian tetap tidak berkurang. Kursus yang diadakan selama 2 hari masih belum mencukupi untuk menurunkan ilmu perkahwinan secara berkesan. Hal ini kerana, berdasarkan laporan yang diterima, kursus tersebut mewajibkan para peserta memahami 7 modul sehari, antaranya akidah dan ibadah, akhlak hubungan dalam keluarga, pengurusan kesihatan keluarga, pengurusan tekanan dan konflik, komunikasi suami isteri dan pengurusan kewangan dan masa, perkhidmatan runding cara dan pembubaran perkahwinan.

Tidak dinafikan topik-topik tersebut amat penting dalam membina rumah tangga, namun pengajur sepatutnya mengatur jadual yang bersesuaian dan tidak terlalu padat bagi memastikan peserta tidak tertekan dan bosan menghadiri kursus tersebut.

Jika dibiarkan, besar kemungkinan, peserta yang hadir semata-mata bagi melepas syarat perkahwinan. Justeru, pengajur sama ada Jabatan Agama Islam Negeri ataupun pihak swasta seharusnya lebih peka terhadap tajuk-tajuk yang dibincangkan bersesuaian dengan masa yang diperuntukkan agar tujuan dan matlamat kursus dapat dicapai.

Selain itu, berdasarkan kritikan yang diterima, kebanyakan tenaga pengajar menghabiskan masa bercerita tentang perkara yang tidak sepatutnya menjadikan kursus tersebut seperti kursus malam pertama. Sehingga kini, berdasarkan Garis Panduan Perlaksanaan Kursus Praperkahwinan yang dikeluarkan oleh JAKIM, syarat khusus bagi tenaga pengajar tidak dinyatakan, hanya syarat permohonan permit yang digariskan namun tidak tertera ciri-ciri tenaga pengajar yang selayaknya. Hasilnya, tenaga pengajar yang tidak bertauliah akan melatih para peserta sekaligus ilmu yang diperolehi tidak seperti yang gariskan di dalam (MBKPI). Oleh itu, pihak berkuasa samada JAKIM mahupun Jabatan Agama Islam Negeri sewajarnya menggubal syarat khusus bagi tenaga pengajar dan mengenakan hukuman kepada para pengajar yang melanggar syarat tersebut.

Seterusnya, semua pihak sama ada Kerajaan Persekutuan mahupun Kerajaan Negeri juga seharusnya memastikan kewujudan kursus praperkahwinan yang dikelola oleh syarikat-syarikat persendirian tidak digunakan sebagai platform lubuk menjana pendapatan semata-mata dan memastikan tenaga pengajar yang dilatih benar-benar mampu menyampaikan ilmu tersebut sebaik mungkin sama ada kursus yang disediakan di bawah JAKIM ataupun tidak bagi memastikan masalah sikap pasangan tidak bertanggunjawab serta masalah pengurusan kewangan mampu dicegah melalui ilmu yang disampaikan di dalam kursus tersebut.

2. Mediasi Kaunseling

Mediasi kaunseling merupakan proses penyelesaian konflik antara dua pihak dengan bantuan pihak ketiga. Ia disediakan samada bagi pasangan yang diawal permasalahan rumah tangga ataupun yang sedang diambil perceraian.

Perkhidmatan kaunseling perkahwinan yang disediakan oleh Kerajaan dibawah pengawalseliaan Lembaga Penduduk dan Pembangunan Keluarga Negara (LPPKN) adalah untuk menolong pasangan suami. Menerusi kaunseling, individu boleh menganalisis, mengenal pasti kelemahan, kekuatan dan kemampuan masing-masing. Dari situ, mereka akan sedar kelemahan dalam diri yang boleh dibaiki. Menurut laporan yang disediakan oleh LPPKN, setakat ini sebanyak 5,349 sesi kaunseling telah dijalankan.

Bagi pasangan Islam, perkhidmatan *al-sulh* disediakan sebagai jalan tengah sebelum proses perceraian diteruskan. Proses ini bertujuan untuk mencapai kompromi perdamaian antara dua atau lebih pihak yang berselisih faham. Dari sudut perundungan sivil, ia di panggil ‘mediation’. Mediasi kaunseling merupakan proses yang perlu dilalui selepas merujuk kepada tribunal perkahwinan.

Selain itu, Jabatan Agama Islam Malaysia (JAKIM) juga menyediakan Pusat Khidmat Keluarga, Sosial dan Komuniti (KSKCARECENTRE) yang bertujuan bagi menangani masalah sosial umat Islam dengan menggunakan pendekatan agama berteraskan kepada al-Quran dan al-Hadith. Pusat tersebut menyediakan khidmat nasihat, bimbingan kekeluargaan dan sosial kepada masyarakat Islam amnya.

Namun begitu, usaha-usaha tersebut masih tidak mendapat sambutan daripada masyarakat. Stigma negatif masyarakat terhadap inisiatif seperti ini menyebabkan rata-rata pasangan segan untuk mendapatkan perkhidmatan ini sedangkan ia dilihat mampu mengatasi masalah ketidaksefahaman pasangan. Hal ini kerana, melalui sesi kaunseling, pasangan dapat mengenali pasangan mereka dengan lebih mendalam dengan bantuan pihak kaunselor yang terlatih dan bertauliah.

Justeru, Kerajaan seharusnya menyediakan pelbagai inisiatif bagi memberi galakan kepada semua masyarakat untuk menyertai sesi mediasi kaunseling yang bukan disediakan kepada pasangan yang ingin bercerai sahaja malah ia juga boleh disertai oleh semua pasangan samada mereka yang dilanda masalah rumah tangga ataupun tidak.

Begitu juga usaha JAKIM melalui KSKCARE sewajarnya diadakan kempen kesedaran secara besar-besaran tentang kewujudan program tersebut agar inisiatif yang dijalankan dapat dimanfaat sebaik mungkin sekaligus menjadi pemangkin kepada pengurangan kes perceraian terutama disebabkan oleh tiada persefahaman sekaligus mampu membendung stigma negatif masyarakat terhadap peserta yang menyertai inisiatif ini.

3. SMARTSTART 2nd Honeymoon

Program SMARTSTART 2nd Honeymoon ialah program yang disasarkan kepada pasangan suami isteri yang telah berkahwin lebih daripada lima tahun dan kebanyakannya terdiri daripada pasangan yang dirujuk oleh Jabatan Hal Ehwal Agama Negeri dan Jabatan Pendaftaran Negara. Objektif utama program ini adalah untuk menyemarakkan semula rasa cinta antara pasangan suami isteri. Antara aktiviti yang dijalankan adalah bengkel suai kenal pasangan, *candle light dinner* serta bengkel pengurusan sumber kewangan.

Walau bagaimanapun, program ini masih belum mendapat sambutan yang memberangsangkan. Hal ini kerana, berdasarkan kenyataan Exco Hal Ehwal Wanita, Keluarga dan Kebajikan Negeri Sembilan, sejak program ini dilaksanakan pada tahun 2010, hanya 150 penyertaan yang direkodkan membuktikan program ini masih kurang mendapatkan sambutan. Kerajaan sewajarnya berusaha bagi menarik lebih ramai pasangan bukan hanya kepada pasangan yang melebihi 5 tahun tempoh perkahwinan malah ia sepatutnya diperluaskan lagi kepada pasangan yang tidak melebihi 5 tahun.

Hal ini kerana, berdasarkan kajian Lembaga Penduduk dan Pembangunan Keluarga Negara (LPPKN), 1/3 pasangan yang bercerai berlaku dalam tempoh 5 tahun pertama

perkahwinan sedangkan inisiatif ini terbukti menyelamatkan ramai pasangan yang ingin bercerai. Berdasarkan kenyataan Pengurus Jawatankuasa Kebajikan, Pembangunan Wanita, Keluarga dan Perpaduan Nasional negeri Terengganu, sebahagian besar yang mengikuti inisiatif tersebut meneruskan perkahwinan dan hanya sebahagian kecil yang tetap bercerai.

Kesimpulan

Isu perceraian sewajarnya diberikan perhatian kritikal oleh semua pemegang taruh samada Kerajaan mahupun NGO. Kerajaan sewajarnya menubuahkan sebuah jawatankuasa khas seperti mana jawatankuasa khas Hak Asasi Manusia dan Kesetaraan Gender ditubuhkan. Hal ini bagi memastikan setiap libat urus serta cadangan yang dikemukakan sewajarnya diberi perhatian penuh agar perlaksanaannya tidak mengambil masa yang lama untuk digerakkan.

Selain itu, setiap inisiatif yang dijalankan sepatutnya memfokuskan ke arah penyelesaian masalah utama perceraian. Ia seharusnya diuar-uarkan dalam skala yang lebih besar supaya inisiatif ini dapat dimanfaatkan oleh sebahagian besar masyarakat sekaligus mampu dijadikan platform sebagai penyelamat kepada masalah perceraian yang serius.



Sila petik karya ini seperti berikut :

Shafiyah Iqlima Mohd Nadzri . (2020, Januari 24). Polemik Perceraian di Malaysia. Perspektif, 15/2020.

Maklumat mengenai penerbitan Terengganu Strategic & Integrity Institute (TSIS) boleh didapati di :
www.tsis.my



© Hak Cipta Terpelihara